

ZENIČKO-DOBOJSKI KANTON

Skupština Kantona Zakonodavno-pravna komisija

Na osnovu člana 65. Zakona o izmjenama i dopunama Zakona o nabavljanju, držanju i nošenju oružja i municije ("Službene novine Zeničko-dobojskog kantona", broj: __/__) i člana ____ i ____ Poslovnika Skupštine Zeničko-dobojskog kantona ("Službene novine Zeničko-dobojskog kantona", broj: __/__) Zakonodavno-pravna komisija Skupštine Zeničko-dobojskog kantona, na sjednici održanoj __. _____ 20__ godine, utvrdila je prečišćeni tekst Zakona o nabavljanju, držanju i nošenju oružja i municije.

Prečišćeni tekst Zakona o nabavljanju, držanju i nošenju oružja i municije obuhvata Zakon o nabavljanju, držanju i nošenju oružja i municije ("Službene novine Zeničko-dobojskog kantona", broj: 19/09; 4/11 i __/__) u kojima su označeni dani stupanja na snagu tih zakona.

Broj: __-__-_____/__, __. _____
20__ godine Zenica

Predsjednik Zakonodavno-pravne komisije

Z A K O N O NABAVLJANJU, DRŽANJU I NOŠENJU ORUŽJA I MUNICIJE

(PREČIŠĆENI TEKST)

DIO PRVI – UVODNE ODREDBE

Član 1. (Predmet)

(1) Ovim zakonom se utvrđuju uslovi za nabavljanje, držanje i nošenje oružja i municije, oduzimanje oružja i municije, promet oružja i municije, način postupanja sa oružjem i municijom, popravlanje i prepravlanje oružja na području Zeničko-dobojskog kantona (u daljem tekstu Kanton).

(2) Odredbe ovog zakona ne odnose se na oružje i municiju za potrebe Oružanih snaga Bosne i Hercegovine, na policijske službenike, službenike sudske policije, pripadnike straže

kazneno-popravnih ustanova, zaposlenike Obavještajno-sigurnosne agencije Bosne i Hercegovine, [pripadnike Oružanih snaga Bosne i Hercegovine](#), kada drže i nose oružje i municiju po propisima svoje službe.

Član 2. (Definicije)

(1) Oružje u smislu ovog zakona je naprava izrađena ili prilagođena da pod pritiskom vazduha, barutnih i drugih plinova ili drugog potisnog sredstva može izbaciti zrno, kuglu, sačmu ili neki drugi projektil, odnosno raspršiti plin ili tečnost te druge naprave koje su namjenjene za samoodbranu, lov ili sport.

(2) Oružjem u smislu ovog zakona smatraju se i dijelovi za vatreno i vazdušno oružje, a to su cijevi za puške i pištolje, ulošci – adapteri sa olučenim cijevima za puške, sa neolučenim cijevima i zatvarači, kao i drugi dijelovi koji su označeni fabričkim brojem.

(3) Pod municijom za vatreno oružje, u smislu ovog zakona, podrazumijeva se cjelovit metak koji sjedinjuje čahuru, kapislu, barutno punjenje i zrno ili sačmu.

(4) Ne smatra se municijom metak bez zrna, kugle ili sačme, punjenje za industrijske naprave i naprave za uspavlivanje životinja i metak za gasno, odnosno signalno oružje.

Član 3. (Primjena)

(1) Oružje i municija se mogu nabavljati, držati i nositi samo po odredbama ovog zakona.

(2) Odredbe ovog zakona u pogledu nabavljanja, držanja i nošenja oružja i municije odnose se i na strane državljanke koji imaju status stalno nastanjenog stranca na teritoriji Bosne i Hercegovine.

Član 4. (Primjena Zakona o upravnom postupku)

Na sva pitanja postupka, koja nisu uređena ovim zakonom, primjenjuju se odredbe Zakona o upravnom postupku ("Službene novine Federacije Bosne i Hercegovine", broj 2/98 i 48/99).

Član 5. (Oružje)

(1) Kao oružje u smislu ovog zakona smatra se:

- a) **vatreno** oružje,
- b) **vazdušno** oružje,
- c) **gasno** oružje,
- d) oružje za **signalizaciju**,
- e) **rasprskavajuće** oružje i
- f) **hladno** oružje.

(2) **Vatreno oružje** su sve vrste pušaka, pištolja i revolvera, kao i sve vrste naprava koje pod pritiskom barutnih gasova izbacuju kroz cijev zrno, kuglu, sačmu ili druge projekte. Vatreno oružje je kratko ili dugačko vatreno oružje koje može biti s repetirajućim mehanizmom, poluautomatsko ili automatsko.

(3) **Vazdušno oružje** su sve vrste pušaka, pištolja, revolvera i druge naprave koje pod pritiskom vazduha izbacuju kroz cijev zrno, kuglicu ili druge projekte.

(4) **Gasno oružje** i oružje za signalizaciju su puške, pištolji i revolveri i druge naprave koje pod pritiskom gasova raspršuju nadražljive tvari, odnosno ispaljuju punjenje namijenjeno isključivo izazivanju glasnog pucanja ili ispaljivanju svijetleće signalne zvjezdice.

(5) **Rasprskavajuće oružje** su sve vrste bombi, mina, granata i drugih naprava opremljenih sa eksplozivnom materijom ili detonatorom (težina, udar, potez, trenje, hemijska reakcija, električna energija i sl.) kod kojih dolazi do oslobađanja energije i njihovog rasprskavanja.

(6) **Hladno oružje** su bodeži, kame, mačevi, sablje, bajoneti i noževi „skakavci“ čije se sječivo nalazi pod pritiskom sabijene opruge, a iz drške iskaču pritiskom na dugme ili polugu ili metalne zvjezdice za bacanje, bez obzira na dužinu oštrice, bokseri, buzdovani, te druga oružja sa skrivenim oštricama. Hladnim oružjem smatraju se i predmeti pogodni za nanošenje povreda, kada se nose na mjestima utvrđenim članom 27. ovog zakona.

Član 6. **(Značenje izraza)**

(1) Pojedini izrazi upotrijebljeni u ovom zakonu imaju sljedeća značenja:

a) automatsko oružje je oružje kod kojeg je jednokratnim pritiskom na obarač moguće ispaliti više metaka,

b) kratko vatreno oružje je oružje čija cijev nije duža od 30 cm, a ukupna dužina ne prelazi 60 cm,

c) lovačko oružje čine lovačke puške, puške raznih kalibara sa olučenim i neolučenim cijevima (puške sa repetirajućim mehanizmom i poluautomatske puške) kojima nije zabranjeno loviti divljač,

d) nadležna policijska stanica je policijska stanica Ministarstva unutrašnjih poslova Zeničko-dobojskog kantona (u daljem tekstu Ministarstvo) na čijem području podnosilac zahtjeva ima prebivalište, odnosno sjedište,

e) oružje za uspavlivanje životinja je oružje koje se upotrebljava u svrhu držanja, čuvanja i zaštite životinja, naučnog istraživanja i prikupljanja stručnih podataka,

f) ovlaštenu trgovac oružjem je pravno ili fizičko lice koje je registrovano, odnosno koje posjeduje odobrenje nadležnog organa za promet oružja i municije,

g) obrtnik je fizičko lice koje je registrovano za obavljanje obrtničke djelatnosti,

h) poluautomatsko oružje je oružje koje je nakon ispaljivanja svakog metka ponovo spremno za ispaljivanje i kod kojeg je iz cijevi jednokratnim pritiskom obarača moguće ispaljivati jedan metak,

i) registrovano oružje je oružje za koje je izdato odobrenje za držanje oružja ili oružni list,

j) snajper je optički nišan za oružje,

k) sprej za omamljivanje je naprava kojom se usmjereno izbacuju u vidu mlaza ili pjene neškodljive nadražljive tvari za onesposobljavanje pojedinca i koje na ljudsko zdravlje imaju kratkotrajan učinak,

l) sportsko oružje čine pištolji i revolveri velikog kalibra podešeni za sportske svrhe, malokalibarske puške i malokalibarski pištolji i revolveri, kalibra 5,6 mm, sa ivičnim paljenjem i sa olučenim i neolučenim cijevima, vazdušne puške i vazdušni pištolji, lukovi, samostreli i druga sportska oružja,

m) staro oružje su duge i kratke puške, kubure i druge vrste oružja za koje se više ne proizvodi municija, koje imaju historijsku ili umjetničku vrijednost ili služi za

umjetničke, kulturne i druge slične priredbe, ili čini sastavni dio narodne nošnje i koje je od strane ovlaštene organizacije ili ovlaštenog pojedinca onesposobljeno za upotrebu, kao i sablje, mačevi i sl.,

n) trofejno oružje je vatreno, vazdušno i hladno oružje koje se čuva kao uspomena iz ranijeg perioda historije Bosne i Hercegovine, ili za njegovog vlasnika predstavlja ličnu ili porodičnu uspomenu, a koje je od strane ovlaštene organizacije ili ovlaštenog pojedinca onesposobljeno za upotrebu, kao i sablje, mačevi i sl.,

o) vlasnik oružja je fizičko ili pravno lice, kome je izdato odobrenje za držanje oružja ili oružni list,

p) zajednički korisnici oružja su lica koja koriste jedno isto lovačko ili sportsko oružje,

r) oružje s repetirajućim mehanizmom je oružje kod kojeg je nakon ispaljivanja svakog metka potrebno ručno pomoću mehanizma ubaciti metak u cijev,

s) dugocijevno vatreno oružje je oružje kod kojeg je cijev duža od 30 cm ili je njegova ukupna dužina veća od 60 cm,

t) oružje s tetivom su lukovi, samostreli i druge naprave koje snagom napete tetive ili druge elastične materije pritiskuju strijelu ili drugi projektil,

u) oružje za jedinačnu paljbu je oružje bez spremnika (magacina), koje se svaki put prije ispaljivanja metka puni ručno ubacivanjem metka u ležište cijevi ili ležište punjenja koje se nalazi na kraju cijevi,

v) dekorativno oružje je oružje koje je izrađeno u dekorativne svrhe i nije ga moguće upotrijebiti ili prepraviti u vatreno oružje,

z) oružje za signalizaciju su pištolji, revolveri, puške i dr. naprave koje pod pritiskom energije barutnog punjenja ispaljuju naboj namijenjen isključivo za izazivanje glasnog pucanja ili ispaljivanju svjetleće signalne zvjezdice,

aa) imitacija oružja su predmeti koji su vanjskim izgledom slični ili jednaki oružju, ali ih nije moguće upotrijebiti niti prepraviti u vatreno oružje,

bb) optički nišan je naprava kojom se oružju povećava preciznost,

cc) lažna municija je municija bez zrna oštrog ili ubojitog zrna kojim se postiže efekat pucanja,

dd) električni paralizatori su ručne naprave koje privremeno onesposobljavaju lice pomoću visokog električnog napona,

ee) mužari-prangije su ručne ili samostojeće naprave namijenjene za izazivanje glasnog pucanja, koje su konstruisane tako da ne mogu primiti cjeloviti naboj, pune se s usta cijevi određenom količinom crnog baruta i pale štapinom, kremenom i kapislom, a zatvaraju sredstvom male specifične težine,

ff) reprodukcija oružja su kopije dugog i kratkog vatrene oružja koje se pune s usta cijevi crnim barutom i pale fitiljom, kremenom ili kapislom,

gg) registracija oružja je unos podataka o oružju i vlasniku, odnosno korisniku oružja u službene evidencije propisane ovim zakonom, kao i propisima donesenim na osnovu ovog zakona, uz izdavanje odgovarajuće isprave,

hh) korisnici lovišta su pravna lica koji su na osnovu odredbi Zakona o lovstvu F BiH dobili lovište na gospodarenje (lovačka udruženja, privredna društva šumarstva, te ostala pravna lica registrirana za bavljenje lovstvom),

ii) civilno strelište je objekat namijenjen sportsko-rekreativnom gađanju koji ispunjava tehničke i sigurnosne uslove za upotrebu registrovanog ili prijavljenog oružja,

jj) onesposobljavanje vatrene oružja je onesposobljavanje svih bitnih dijelova oružja na način da njihovim uklanjanjem, zamjenom ili izmjenom ne može biti omogućeno njegovo osposobljavanje,

kk) prenošenje oružja je premještanje oružja za koje je izdan oružni list s jednog mjesta na drugo,

ll) promet oružja i municije je nabavka oružja ili municije radi prodaje, smještaj i čuvanje oružja i municije u svrhu prodaje, te njegova prodaja na malo i veliko u BiH,

mm) popravlanje oružja je otklanjanje kvarova na oružju i zamjena ili ugradnja originalnih dijelova,

nn) prepravlanje oružja je prilagođavanje oružja drugoj municiji, zamjena ili ugradnja bitnih dijelova oružja i drugi zahvati na oružju

kojima se utječe na njegovo funkcioniranje ili tehnička svojstva.

(2) U smislu ovog zakona oružjem se ne smatra: dekorativno oružje; imitacije oružja; oružje koje je trajno onesposobljeno za upotrebu tehničkim postupcima koji su određeni posebnim propisima ili su priznati od strane nadležnog organa; oružje koje je namijenjeno za alarmiranje, spašavanje života; podvodne puške i drugi predmeti koji snagom opruge, napete gume ili sabijenog plina izbacuju osti ili harpun koji su isključivo namijenjeni ribolovu; oružje koje se koristi u industrijske ili tehničke svrhe pod uslovom da može biti korišteno u samo za to navedene svrhe; municija za vazdušno oružje; municija za oružje s tetivom i lažna municija.

Član 6a.

(Kategorizacija oružja)

Oružje se prema ovom zakonu razvrstava u četiri kategorije, i to:

Kategorija A:

1) vojni projektili s eksplozivnim punjenjem, lanseri i bacači,

2) automatsko vatreno oružje,

3) vatreno oružje koje je kamuflirano tako da izgleda kao neki drugi predmet,

4) municija s probojnim, eksplozivnim, obilježavajućim i zapaljivim projektilima, te projektili za takvu municiju,

5) municija za pištolje i revolvare sa projektilom koji ima ekspanzijski učinak i projektili za takvu municiju osim municije za lov ili sportsko streljaštvo za lica kojima je dozvoljeno da koriste to oružje,

6) minsko-eksplozivna sredstva i dijelovi,

7) oružje koje je izrađeno ili prerađeno bez odobrenja za promet oružja, osim oružja iz kategorije C alineja 3),

8) poluautomatsko vatreno oružje za civilnu upotrebu, koje po svom autentičnom izgledu odgovara automatskom oružju,

9) oružje bez označene marke, kalibra i fabričkog broja,

10) oružje sa integralnim prigušivačem, prigušivači namijenjeni oružju, dijelovi za

prigušivače i ostala posebna oprema za oružje izrađena za posebne namjene,

11) ostalo vatreno oružje koje nije obuhvaćeno kategorijama B, C ili D.

Kategorija B:

1) poluautomatsko ili repetirajuće kratkocijevno vatreno oružje,

2) kratkocijevno oružje za jedinačnu paljbu sa središnjim paljenjem,

3) kratkocijevno oružje za jedinačnu paljbu s rubnim paljenjem,

4) lovačko oružje u skladu sa Zakonom o lovstvu Federacije BiH,

5) poluautomatsko dugocijevno vatreno oružje s magacinom i ležištem za najviše tri metka kod kojeg se magacin, odnosno opruga za punjenje može skinuti, odnosno nije sigurno da li je oružje napravljeno tako da se uz obični alat može prepraviti u oružje s magacinom i ležištem za više od tri metka,

6) repetirajuće i poluautomatsko dugocijevno vatreno oružje s glatkom cijevi ukupne dužine do 60 cm,

7) repetirajuće dugocijevno vatreno oružje koje nije obuhvaćeno u alineji 6),

8) dugocijevno oružje za jedinačnu paljbu s jednom ili više užljebljenih cijevi,

9) dugocijevno oružje za jedinačnu paljbu s jednom ili više glatkih cijevi,

10) poluautomatsko dugocijevno vatreno oružje koje nije obuhvaćeno alinejama od 4) do 7),

11) staro i trofejno oružje.

Kategorija C:

1) gasno ili plinsko oružje,

2) reprodukcije vatrelog oružja kod kojih se ne upotrebljava jedinstveni naboj,

3) mužari ili prangije,

4) oružje za uspavlivanje životinja.

Kategorija D:

1) vazdušno oružje,

2) električni paralizatori,

3) raspršivači (u daljnjem tekstu „sprejevi za omamljivanje“),

4) oružje s tetivom,

5) hladno oružje.

Član 6b. (Ograničenja)

(1) Oružje iz člana 6a. ovog zakona se u pogledu prava i obaveza vlasnika oružja, razvrstava u:

a) Zabranjeno oružje:

1) oružje kategorije A;

2) hladno oružje kojem je osnovna namjena napad ili nanošenje ozlijeda; i

3) hladno oružje kada se nosi na javnim mjestima;

b) Dozvoljeno oružje za koje je potrebno prethodno odobrenje od nadležne Policijske stanice:

1) oružje kategorije B;

c) Dozvoljeno oružje za koje je potrebna prijava nadležnoj policijskoj stanici:

1) oružje kategorije C;

2) vazdušno oružje,

3) električni paralizatori, i

4) sprejevi za omamljivanje.

d) Dozvoljeno oružje za koje nije potrebno odobrenje niti prijava nadležnoj policijskoj stanici:

1) oružje s tetivom,

2) hladno oružje, osim hladnog oružja navedenog u tački a) alineja 2) i 3) ovog stava.

(2) Zabranjeno je nabavljanje, držanje i nošenje oružja kategorija A, osim ako ovo zakonom nije drugačije predviđeno.

(3) Zabranjeno je nabavljanje, držanje i nošenje oružja kategorije B bez odgovarajuće isprave o oružju.

(4) Zabranjeno je držanje ili nošenje oružja kategorije C, vazdušnog oružja, električnih paralizatora i sprejeva za omamljivanje iz kategorije D bez odgovarajuće potvrde o prijavi oružja.

(5) Oružje kategorije C i D mogu nabavljati, držati i nositi samo lica starija od 18 godina.

DIO DRUGI – NABAVLJANJE, DRŽANJE I NOŠENJE ORUŽJA I MUNICIJE

Član 7. **(Zahtjev)**

Zahtjev za izdavanje odobrenja za nabavku oružja podnosi se na propisanom obrascu nadležnoj policijskoj stanici Ministarstva.

Član 8. **(Opći i posebni uslovi za izdavanje odobrenja za nabavljanje oružja fizičkom licu)**

(1) Nadležna policijska stanica izdat će fizičkom licu odobrenje za nabavljanje oružja ukoliko ispunjava opće i posebne uslove.

(2) **Opći uslovi** za izdavanje odobrenja za nabavljanje oružja su:

a) da je lice navršilo 21 godinu života,

b) da ima opravdani razlog za nabavljanje oružja,

c) da lice nije osuđivano za krivično djelo, odnosno da se protiv lica ne vodi istraga ili krivični postupak, osim za krivična djela protiv bezbjednosti javnog saobraćaja,

d) da u posljednje dvije godine lice nije kaznjeno za prekršaj protiv javnog reda i mira sa elementima nasilja: učestvovanje u tuči, zlostavljanje ili fizički napad na drugog; izazivanje tuče, zlostavljanja ili fizičkog napada na drugog; narušavanje javnog reda i mira naročito drskim ponašanjem; ugrožavanje sigurnosti; izazivanje osjećaja ugroženosti druge osobe, prijetnjom da će napasti na život ili tijelo; pucanje iz vatrenog oružja, odnosno za prekršaj propisan ovim zakonom ili za prekršaj sa elementima nasilja propisan drugim zakonom, kao i za vrijeme dok se protiv tog lica vodi postupak za takve prekršaje,

e) da ne postoje okolnosti kao što je češće i prekomjerno uživanje alkohola, narkotičkih ili drugih omamljujućih sredstava, poremećeni porodični, susjedski odnosi, sukobi s okolinom, agresivno i ekscenno

ponašanje, te drugi poremećaji u ponašanju, disciplinske povrede propisa o lovstvu ili sportskom streljaštvu, i druge okolnosti koje ukazuju da bi oružje moglo biti zloupotrebjeno.

(3) **Posebni uslovi** za izdavanje odobrenja za nabavljanje oružja su:

a) da je lice zdravstveno sposobno za držanje i nošenje oružja,

b) da raspolaže tehničkim znanjem i vještinom za pravilno rukovanje oružjem i da poznaje propise koji se odnose na držanje i nošenje oružja, i

c) da ima uslove za siguran smještaj i čuvanje oružja.

(4) Izuzetno, od stava (2) tačka a) ovog člana, odobrenje za nabavku ličnog oružja može se izdati licima iz člana 1. stav (2) ovog zakona sa navršenih 18 godina života i licima koja su prema posebnim propisima ovlaštena držati i nositi oružje; članovima sportskih streljačkih organizacija koji se aktivno natječu u streljaštvu i licima sa položenim lovačkim ispitom; kao i zaposlenicima agencija za zaštitu ljudi imovine i pravnih lica sa organizovanom unutrašnjom službom za zaštitu ljudi i imovine na poslovima fizičke zaštite ili poslovima odgovornog lica.

Član 9.

(Utvrđivanje uslova za izdavanje odobrenja za nabavljanje vatrenog oružja fizičkom licu)

(1) Opravnani razlog iz člana 8. stav (2) tačka b) za nabavljanje i držanje vatrenog oružja kategorije B ima fizičko lice ukoliko se ocijeni da je njegova lična i/ili sigurnost članova njegove uže porodice ugrožena ili bi mogla biti ugrožena u tolikoj mjeri da mu za takvo osiguranje treba oružje i/ili ukoliko zbog naravi posla ili okolnosti pod kojima ga obavlja postoji potreba za nabavkom takve vrste oružja.

(2) Fizičko lice ima opravdani razlog za nabavljanje lovačkog oružja ukoliko je član lovačke organizacije i ukoliko je položio lovački ispit, što se dokazuje uvjerenjem lovačke organizacije čiji je član.

(3) Fizičko lice ima opravdani razlog za nabavljanje lovačkog oružja ako mu je to oružje potrebno za zaštitu imovine u ličnoj svojini, što se dokazuje uvjerenjem nadležnog

organa da je lice registrovano kao poljoprivrednik.

(4) Fizičko lice ima opravdani razlog za nabavljanje sportskog oružja ukoliko je član sportske streljačke organizacije, što se dokazuje uvjerenjem sportske streljačke organizacije čiji je član.

(5) Nadležna policijska stanica utvrdit će da li su ispunjeni uslovi iz člana 8. stav (2) tačka c) i d) ovog zakona.

(6) Postojanje uslova iz člana 8. stav (2) tačka e) cijeni nadležna policijska stanica na osnovu činjenica sadržanih u službenoj zabilješci koju policijski službenik sastavlja nakon izvršenog traženja i prikupljanja podataka i obavijesti od građana, nadležnih organa, ustanova i institucija.

(7) Ukoliko lice podnosi zahtjev za nabavljanje lovačkog i/ili sportskog oružja, postojanje činjenica o disciplinskim povredama iz člana 8. stav (2) tačka e) podnosilac zahtjeva dokazuje potvrdom koju izdaje lovačka organizacija i/ili sportska streljačka organizacija čiji je član.

(8) Postojanje uslova iz člana 8. stav (3) tačka b) dokazuje se potvrdom Komisije Ministarstva koja vrši osposobljavanje lica za pravilno rukovanje vatrenim oružjem i poznavanje propisa koji se odnose na nabavljanje, držanje i nošenje oružja.

(9) Uslov iz člana 8. stav (3) tačka c), nadležna policijska stanica cijeni na osnovu ovjerene izjave podnosioca zahtjeva.

(10) Podnosilac zahtjeva uvjerenja i potvrde kojim dokazuje činjenice iz stava (2), (3), (4), (7) i (9) ovog člana, prilaže uz zahtjev za izdavanje odobrenja radi nabavljanja oružja.

(11) Lice koje je jednom položilo ispit o osposobljenosti pravilnim rukovanjem vatrenim oružjem i poznavanju propisa koji se odnose na nabavljanje, držanje i nošenje oružja, ne može se više upućivati na takvu provjeru znanja.

(12) Lice koje je položilo lovački ispit ne može se upućivati na obuku iz stava (8) ovog člana i provjeru znanja iz člana 9c. stav (1) tačka a) ovog zakona.

(13) Komisiju iz stava (8) ovog člana posebno za svaku policijsku upravu imenuje policijski komesar.

Član 9a.

(Dostavljanje dokaza o ispunjavanju posebnih uslova i poznavanje propisa koji se odnose na nabavljanje, držanje i nošenje oružja)

Od podnosioca zahtjeva za kojeg se utvrdi da ispunjava opće uslove iz člana 8. stav (2) ovog zakona, nadležna policijska stanica će zatražiti da u roku od 30 dana dostavi dokaze o ispunjavanju posebnih uslova iz člana 8. stav (3) tačka a) i b) ovog zakona.

Član 9b.

(Dokazi o zdravstvenoj sposobnosti za nabavljanje, držanje i nošenje oružja)

(1) Postojanje uslova iz člana 8. stav (3) tačka a) podnosilac zahtjeva dokazuje uvjerenjem o zdravstvenoj sposobnosti.

(2) Uvjerenje o zdravstvenoj sposobnosti za nabavljanje, držanje i nošenje oružja i municije izdaju ovlaštene zdravstvene ustanove sa liste koju utvrđuje Ministarstvo zdravstva Zeničko-dobojskog kantona po mjestu prebivališta fizičkog lica, u kojem se o podobnosti podnosioca zahtjeva za nabavljanje, držanje i nošenje oružja navode pojedinačna i zaključno mišljenje članova zdravstvene komisije u sastavu ljekara oftalmološke, neurološke, psihijatrijske i psihologijske specijalnosti i ljekara specijaliste medicine rada.

(3) Uvjerenje o zdravstvenoj sposobnosti iz stava (2) ovog člana ne može biti starije od šest mjeseci od dana izdavanja.

Član 9c.

(Dokazi o tehničkom znanju za pravilno rukovanje oružjem i poznavanju propisa koji se odnose na nabavljanje, držanje i nošenje oružja)

(1) Ispunjavanje uslova iz člana 8. stav (3) tačka b) ovog zakona podnosilac zahtjeva dokazuje:

a) za oružje kategorije B – potvrdom o osposobljenosti za pravilno rukovanje, držanje i nošenje oružja koju izdaje Komisija za ocjenu osposobljenosti za pravilno rukovanje, držanje i nošenje oružja, koju na prijedlog policijskog komesara imenuje ministar Ministarstva.

b) izuzetno, postojanje uslova iz člana 8. stav (3) tačka b) ovog zakona, lica iz člana 1. stav (2) ovog zakona za vrijeme aktivne službe ili nakon odlaska u penziju,

dokazuju potvrdom o zaposlenju, odnosno o prestanku radnog odnosa zbog ispunjavanja uslova za penziju, a lica koja su zaposlenici u stalnom radnom odnosu agencija za zaštitu ljudi i imovine i pravnih lica sa organizovanom unutrašnjom službom za zaštitu koji rade na poslovima fizičke zaštite ili poslovima odgovornog lica, dokazuju potvrdom o zaposlenju.

(2) Potvrda o zaposlenju iz stava (1) tačka b) ovog člana ne može biti starija od šest mjeseci od dana izdavanja.

(3) Program obuke, sastav, način rada, osposobljavanja i ocjene osposobljenosti za rukovanje vatrenim oružjem, te troškove rada komisija iz stava (1) tačke a) i člana 9. stav (8) ovog zakona na prijedlog policijskog komesara donosi i utvrđuje ministar Ministarstva.

Član 10.

(Odobrenje za nabavljanje oružja fizičkom licu)

(1) Nadležna policijska stanica izdat će odobrenje fizičkom licu za nabavljanje oružja kategorije B ukoliko ispunjava opće i posebne uslove iz člana 8. ovog zakona.

(2) Ukoliko fizičko lice ne ispunjava jedan od uslova za nabavljanje oružja propisani ovim zakonom, nadležna policijska stanica odbit će zahtjev za izdavanje odobrenja.

(3) Fizičkom licu odobrenje za nabavljanje lovačkog oružja može se izdati samo ako je položilo lovački ispit i član je lovačke organizacije.

(4) Izuzetno od odredbe stava (3) ovog člana, odobrenje za nabavljanje lovačkog oružja može se izdati fizičkom licu kome je držanje i nošenje takvog oružja neophodno radi zaštite imovine u ličnoj svojini (stada, usjev i sl.) koje je registrovano kao poljoprivrednik, kao i streljačkim organizacijama radi upražnjavanja streljačkog sporta.

(5) Odobrenje za nabavljanje sportskog oružja, za koje je po ovom zakonu potrebno odobrenje, izdaje se samo streljačkim organizacijama i njihovim članovima.

(6) Odobrenje za nabavljanje oružja važi šest mjeseci od dana uručenja.

(7) Dijelovi za oružje iz stava (1) ovog člana sa označenim fabričkim brojem

nabavljaju se na osnovu odobrenja nadležne policijske stanice, i to samo za oružje za koje je izdat oružni list, odnosno odobrenje za držanje oružja, a za podnosioca takvog zahtjeva nije potrebno utvrđivati uslove za nabavljanje oružja iz člana 8. stav (2) i (3) ovog zakona.

(8) Zamijenjene tehnički ispravne dijelove oružja iz stava (1) ovog člana, vlasnik oružja je dužan uz ličnu izjavu datu na zapisnik predati nadležnoj policijskoj stanici radi uništenja koja će o tome izdati potvrdu a postupak uništenja provest će komisija iz člana 39. ovog zakona.

(9) Oružje i dijelove za oružje može nabaviti samo lice na čije ime odobrenje glasi.

Član 11.

(Odobrenje za nabavljanje oružja pravnom licu)

(1) Nadležna policijska stanica izdat će pravnom licu odobrenje za nabavljanje oružja kategorije B ukoliko ispunjava slijedeće uslove:

a) da pravno lice ima opravdan razlog za nabavljanje oružja,

b) da odgovorno lice i lice zaduženo za sigurnost u pravnom licu ispunjava opće i posebne uslove iz člana 8. ovog zakona, izuzev uslova iz stava (3) tačke c) tog člana,

c) da pravno lice ispunjava uslove iz člana 8. stav (3) tačka c) ovog zakona.

(2) Opravdani razlog za nabavljanje oružja ima pravno lice koje je kod nadležnog suda registrovano za obavljanje djelatnosti uzgoja, držanja, čuvanja ili zaštite životinja; upravljanje i gazdovanje šumama; sportskog streljaštva; vođenje civilnih strelišta; naučnog istraživanja za koje je potrebno oružje; muzeji; agencije za zaštitu ljudi i imovine; pravna lica koja imaju uspostavljenu unutrašnju službu zaštite u skladu sa važećim propisima, kao i korisnici lovišta.

(3) Pravna lica iz stava (2) ovog člana osim agencije za zaštitu ljudi i imovine i pravnog lica koje ima organizovanu unutrašnju službu zaštite, može nabaviti oružje čiji broj zavisi od potrebe i broja zaposlenih lica koja imaju potrebu za korištenje oružja.

(4) Nadležna policijska stanica odbit će zahtjev za izdavanje odobrenja za nabavljanje oružja pravnom licu ako ne ispunjava jedan od uslova za nabavljanje oružja propisanih ovim zakonom.

Član 11a.

(Odobrenje za nabavljanje municije fizičkom i pravnom licu)

(1) Odobrenje za nabavljanje municije može se izdati samo za oružje za koje je fizičkom i pravnom licu izdat oružni list, odnosno odobrenje za držanje oružja.

(2) Odobrenje za nabavljanje municije važi šest mjeseci od dana izdavanja, a može se izdati jedanput u toku kalendarske godine za količinu sadržanu u originalnim pakovanjima a najviše 60 komada, izuzev agencija za zaštitu ljudi i imovine, lovačkih i streljačkih organizacija i drugih pravnih lica radi obavljanja njihove djelatnosti kojima se odobrenje za nabavljanje municije može izdati za količinu koja je potrebna za njihovu djelatnost, odnosno aktivnost.

(3) Odobrenje za nabavljanje municije koje nije iskorišteno u roku od šest mjeseci fizičko i pravno lice obavezno je vratiti organu koji ga je izdao u roku od osam dana od dana isteka roka važenja.

(4) Izuzetno, municija se može nabaviti bez odobrenja, u slučaju:

a) za puške sa neolučenim cijevima na osnovu oružnog lista i odobrenja za držanje oružja;

b) za oružje kategorije C i vazdušno oružje iz kategorije D na osnovu potvrde o prijavi.

Član 12.

(Oružni list)

(1) Za držanje i nošenje oružja kategorije B nadležna policijska stanica fizičkom licu izdaje oružni list.

(2) Vlasnik oružja dužan je, kada drži ili nosi oružje, imati uz sebe oružni list izdat za to oružje i na zahtjev policijskog službenika i drugog ovlaštenog službenog lica Ministarstva, omogućiti uvid u to oružje i oružni list.

(3) Izdavanje oružnog lista ne može se odbiti licu kome je izdato odobrenje za nabavljanje oružja, osim u slučajevima predviđenim ovim zakonom.

(4) Na isto lovačko ili sportsko oružje mogu se izdati oružni listovi [i potvrde o prijavi](#) za najviše tri lica.

(5) Oružni list izdaje se sa rokom važnosti od 10 godina.

(6) Vlasnik oružja može, u roku od 60 dana prije isteka roka važnosti oružnog lista, podnijeti zahtjev za produženje važnosti oružnog lista nadležnoj policijskoj stanici, uz koji prilaže dokaze da je oružje ispravno, da ispunjava uslov u pogledu zdravstvene sposobnosti za držanje i nošenje oružja, a za lovačko i [sportsko](#) oružje i dokaz da je član lovačke i streljačke organizacije. Nadležna policijska stanica utvrđuje da li imalac oružja ispunjava uslove propisane u članu 8. stav (2) tačke b), c), d) i e) ovog zakona.

(7) Imalac oružja dužan je oružje, municiju i oružni list predati nadležnoj policijskoj stanici ukoliko ne ispuni uslove ili ne podnese zahtjev za produženje važnosti oružnog lista u roku iz stava [\(6\)](#) ovog člana.

(8) Nadležna policijska stanica je obavezna u roku od 60 dana, donijeti rješenje o oduzimanju oružja, municije i oružnog lista, te postupiti u skladu sa članom 37. ovog zakona.

(9) Obrazac i sadržaj obrasca oružnog lista, na prijedlog policijskog komesara, propisuje ministar Ministarstva.

(10) Protiv rješenja o oduzimanju iz stava [\(8\)](#) ovog člana može se izjaviti žalba policijskom komesaru u roku od 15 dana od dana prijema rješenja i protiv rješenja po žalbi se može voditi upravni spor.

Član 13. **(Žalba)**

[\(1\) Protiv rješenja nadležne policijske stanice o odbijanju zahtjeva za izdavanje odobrenja za nabavljanje oružja licima iz člana 10. i 11. ovog zakona, podnosilac zahtjeva može izjaviti žalbu policijskom komesaru u roku od 15 dana od dana prijema rješenja.](#)

[\(2\) Rješenje policijskog komesara je konačno i protiv rješenja po žalbi se ne može voditi upravni spor.](#)

Član 14. **(Trofejno oružje)**

[\(1\) Nadležna policijska stanica, izdat će odobrenje za držanje trofejnog oružja fizičkom licu koje ispunjava opće i posebne uslove propisane članom 8. ovog zakona.](#)

[\(2\) Nadležna policijska stanica izdat će odobrenje za držanje trofejnog oružja pravnom licu koje ispunjava uslove propisane članom 11. ovog zakona.](#)

[\(3\) Fizičko i pravno lice iz stava \(1\) i \(2\) ovog člana uz zahtjev za nabavljanje trofejnog oružja prilažu potvrdu da je oružje od strane ovlaštenog pravnog lica ili obrtnika za popravlanje ili prepravlanje oružja prepravljeno u trofejno oružje.](#)

[\(4\) Vatreno oružje koje je onesposobljeno za upotrebu ne smije se osposobljavati, osim u slučaju iz stava \(6\) ovog člana.](#)

[\(5\) Trofejno oružje može se prenijeti u vlasništvo drugom licu koje posjeduje odobrenje za držanje trofejnog oružja.](#)

[\(6\) U slučaju iz stava \(5\) ovog člana kada se radi o oružju koje je dozvoljeno nabavljati po ovom zakonu, lice na koga je trofejno oružje preneseno u vlasništvo može isto registrovati kao ispravno oružje ako posjeduje odobrenje za nabavljanje te vrste oružja i potvrdu iz stava \(3\) ovog člana i da se za njega može izdati oružni list ili odobrenje za držanje oružja.](#)

[\(7\) Zabranjeno je nositi i upotrebljavati trofejno oružje i za ovo oružje nabavljati i držati municiju.](#)

[\(8\) Odobrenje za držanje trofejnog oružja izdaje se sa trajnim rokom važenja.](#)

Član 15. **(Staro oružje)**

[\(1\) Nadležna policijska stanica, izdat će odobrenje za sakupljanje i držanje starog oružja fizičkom licu koje ispunjava opće i posebne uslove propisane članom 8. ovog zakona.](#)

[\(2\) Nadležna policijska stanica izdat će odobrenje za sakupljanje i držanje starog oružja pravnom licu koje ispunjava uslove propisane članom 11. ovog zakona.](#)

[\(3\) Zabranjeno je osposobljavati za upotrebu, upotrebljavati staro oružje i za ovo oružje nabavljati i držati municiju.](#)

[\(4\) Lice koje sakupi staro oružje, dužno je isto prijaviti nadležnoj policijskoj stanici u](#)

roku od osam dana od dana sakupljanja, i uz prijavu dostaviti dokaz da je oružje trajno onesposobljeno.

(5) Oružje koje se drži na temelju odobrenja iz stava (1) i (2) ovog člana, može se prodati ili predati licima kojima je izdato odobrenje za sakupljanje i držanje starog oružja.

(6) Izuzetno, muzeji uz staro oružje mogu sakupljati i oružje kategorije A koje se više ne izrađuje ili koje ne upotrebljavaju oružane i policijske snage, pod uslovom da je trajno onesposobljeno.

(7) Odobrenje za sakupljanje i držanje starog oružja izdaje se s trajnim rokom važenja.

(8) Nadležna policijska stanica vodi evidenciju o prijavljenom starom oružju, a o vođenju evidencije i njenom sadržaju bliže propise na prijedlog policijskog komesara donosi ministar Ministarstva.

Član 16.

(Oružje sa obavezom prijavljivanja nadležnoj policijskoj stanici)

(1) Vazdušno oružje, dijelovi za vazdušno oružje i oružje s tetivom mogu nabavljati i držati samo sportske streljačke organizacije i njihovi članovi.

(2) Fizička i pravna lica mogu bez odobrenja nabavljati i držati oružje kategorije C, električne paralizatore i sprejeve za omamljivanje.

(3) Fizička i pravna lica koja nabave oružje iz stava (1) i (2) ovog člana, dužni su, osim oružja s tetivom, isto prijaviti nadležnoj policijskoj stanici u roku od osam dana od dana nabavljanja i uz prijavu dostaviti dokaz o porijeklu oružja.

(4) Električni paralizatori i sprejevi za omamljivanje iz kategorije D, upotrebljavaju se samo za samoodbranu i na način da se time ne ugrožava sigurnost drugih lica.

(5) Oružje za uspavljivanje životinja iz kategorije C, dijelovi za takvo oružje, može nabaviti samo pravno i fizičko lice koje ima registrovanu djelatnost za uzgoj, držanje, čuvanje ili zaštitu životinja.

(6) Za prijavljeno oružje iz stava (1) i (2) ovog člana nadležna policijska stanica

izdaje potvrdu o prijavi oružja koja o tome vodi odgovarajuću evidenciju.

(7) Zamijenjene tehnički ispravne dijelove vazdušnog oružja i oružja za uspavljivanje životinja, vlasnik oružja je dužan uz ličnu izjavu datu na zapisnik predati nadležnoj policijskoj stanici radi uništenja, koja će o tome izdati potvrdu, a postupak uništenja provest će komisija iz člana 39. ovog zakona.

Član 17. (Snajper)

(1) Fizičko lice, streljačka organizacija i organizacija koja gazduje lovištem, koje nabavi snajper, dužni su da to prijave nadležnoj policijskoj stanici najkasnije u roku od 8 dana od dana nabavljanja.

(2) Fizičko lice, streljačka organizacija i organizacija koje gazduje lovištem, dužno je prijaviti nadležnoj policijskoj stanici otuđenje, nestanak ili gubljenje snajpera najkasnije u roku od 8 dana od dana otuđenja, nestanka ili gubljenja snajpera, odnosno od dana kada su saznali za otuđenje, nestanak ili gubljenje snajpera.

(3) Nadležna policijska stanica vodi evidenciju o snajperima koje drže fizička lica, streljačke organizacije i organizacije koje gazduju lovištima.

(4) Bliže propise o vođenju evidencije iz stava (3) ovog člana, na prijedlog policijskog komesara, donosi ministar Ministarstva.

Član 18.

(Odobrenje za držanje oružja pravnom licu)

(1) Za držanje oružja kategorije B nadležna policijska stanica na zahtjev pravnog lica iz člana 11. stav (2) ovog zakona izdaje odobrenje za držanje oružja.

(2) Rukovanje i korištenje oružja pravno lice povjerit će samo punoljetnom licu koje ispunjava opće i posebne uslove propisane članom 8. stav (2) tačka b), c), d) i e) i stav (3) tačka a) i b) ovog zakona.

(3) Izdavanje odobrenja za držanje oružja ne može se odbiti licu iz stava (1) ovog člana osim u slučajevima predviđenim ovim zakonom.

(4) Agencijama za zaštitu ljudi i imovine, pravnim licima sa organizovanom unutrašnjom

[službom za zaštitu ljudi i imovine, i korisnicima lovišta, nadležna policijska stanica izdat će](#) odobrenje za nabavljanje i držanje oružja i municije samo ako su organizovane u skladu sa Zakonom o agencijama i unutrašnjim službama za zaštitu ljudi i imovine („Službene novine Federacije Bosne i Hercegovine“, broj 78/08) i [Zakonom o lovstvu \(„Službene novine Federacije BiH“, broj: 4/06\) i 8/10\), a drugom pravnom licu iz člana 11. stav \(2\) ovog zakona samo ako je organizovano u skladu sa važećim propisima.](#)

[\(5\) Pravno lice iz stava \(1\) ovog člana dužno je voditi evidencije o nabavljenoj oružju propisane ovim zakonom.](#)

Član 19.

(Postupak u slučaju smrti vlasnika oružja)

(1) U slučaju smrti vlasnika oružja, član njegove porodice ili drugo lice koje je s njim živjelo u zajedničkom domaćinstvu, dužni su da u roku od 60 dana od dana njegove smrti, a na zahtjev nadležne policijske stanice i prije isteka tog roka, predaju na čuvanje toj policijskoj stanici oružje, municiju i oružni list, odnosno dozvolu za držanje trofejnog oružja o čemu nadležna policijska stanica vodi evidenciju.

(2) Licu koje naslijedi oružje iz stava (1) ovog člana, na njegov zahtjev, nadležna policijska stanica izdat će oružni list, odnosno odobrenje za držanje trofejnog oružja, ukoliko ispunjava uslove iz člana 8. ovog zakona.

(3) Ako se oružni list, odnosno odobrenje za držanje oružja ne izda licu iz stava (2) ovog člana ili vlasnik oružja nema nasljednika, nadležna policijska stanica postupit će u skladu sa odredbama člana 37. i 39. ovog zakona.

(4) Izuzetno od stava (2) ovog člana oružje i municija maloljetnog nasljednika čuvat će se kod nadležne policijske stanice dok ne navršši 21 godinu života.

(5) Nasljednik oružja iz stava (4) ovog člana sa navršenom 21 godinom života dužan je s oružjem postupiti na način propisan stavom (2) ovog člana.

Član 20.

(Obaveza prijavljivanja nabavke oružja)

(1) Fizičko i pravno lice kojem je izdato odobrenje za nabavljanje oružja, dužna

su u roku od osam dana od dana izvršene nabavke oružja podnijeti pismeni zahtjev nadležnoj policijskoj stanici radi izdavanja oružnog lista, odnosno registracije oružja.

(2) Fizičko i pravno lice kojem je izdato odobrenje za nabavljanje oružja, a oružje nije nabavilo u roku od šest mjeseci od dana uručenja odobrenja, dužno je vratiti odobrenje za nabavljanje oružja u roku od osam dana od dana protoka roka nadležnoj policijskoj stanici koja je izdala odobrenje.

Član 21.

(Zamjena vatrenog oružja)

(1) Zamjena vatrenog oružja može se izvršiti samo ako oružni listovi glase na istu vrstu vatrenog oružja.

(2) Fizičko lice koje zamijeni oružje dužno je da u roku od osam dana od dana zamjene o tome obavijestiti nadležnu policijsku stanicu i da podnese zahtjev za izdavanje novog oružnog lista.

(3) Zamjena vatrenog oružja može se izvršiti i sa pravnim licem iz člana 40. ovog Zakona koje je dužno u roku od osam dana od dana zamjene obavijestiti nadležnu policijsku stanicu o izvršenom postupku zamjene.

Član 22.

(Prenos prava vlasništva)

[\(1\) Fizičko i pravno lice može prenijeti pravo vlasništva na oružje drugom licu pod uslovima predviđenim ovim zakonom.](#)

(2) Prenos prava vlasništva vrši se na temelju pismeno zaključenog ugovora sa ovjerenim potpisima ugovornih strana kod nadležnog organa.

(3) Vlasnik oružja koji je prenio pravo vlasništva na oružju dužan je najkasnije u roku od osam dana prijaviti i predati nadležnoj policijskoj stanici oružni list, odobrenje za držanje oružja, [potvrdu o prijavi oružja, primjerak ugovora iz stava \(2\) ovog člana i primjerak odobrenja za nabavljanje oružja izdatog licu na koje se prenosi pravo vlasništva, ako je za nabavljanje takvog oružja potrebno odobrenje u skladu sa odredbama ovog zakona.](#)

(4) Fizičko i pravno lice može prenijeti pravo vlasništva na vatreno i [sportsko](#) oružje i pravnom licu iz člana 40. ovog zakona, koje je dužno u roku od osam dana obavijestiti

nadležnu policijsku stanicu o izvršenom prenosu prava vlasništva.

Član 23.
**(Oduzimanje odobrenja za nabavljanje
oružja)**

(1) Odobrenje za nabavljanje oružja ili municije oduzet će se ako poslije izdavanja odobrenja nastupi neki od razloga iz člana 8. stav (2) tačke b), c), d) i e) i stav (3) tačka a) i c), odnosno člana 11. stav (1) ovog zakona.

(2) Oružni list i odobrenje za držanje oružja neće se izdavati za oružje za koje se ne može dokazati porijeklo; koje je tehnički neispravno a nije onesposobljeno, kao i u slučaju ako nastupi neki od razloga iz člana 8. stav (2) tačke b), c), d) i e) i stav (3) tačka a) i c), odnosno člana 11. stav (1) ovog zakona.

(3) O oduzimanju odobrenja za nabavljanje oružja ili municije, nadležna policijska stanica donosi rješenje protiv kojeg se može izjaviti žalba policijskom komesaru u roku od 15 dana od dana prijema rješenja a protiv rješenja po žalbi se može voditi upravni spor.

**DIO TREĆI– POSTUPANJE SA ORUŽJEM
I MUNICIJOM**

Član 24.
(Postupanje sa oružjem i municijom)

(1) S oružjem i municijom mora se postupati s naročitom pažnjom.

(2) Naročita pažnja u postupanju s oružjem i municijom pokazuje se u njegovom pravilnom čuvanju, pravilnom, stručnom i pažljivom rukovanju, nošenju, prenošenju i držanju u ispravnom stanju.

(3) Građani su dužni pridržavati se pravila javno istaknutih zabrana o unošenju oružja u određene prostore ili prostorije.

(4) Fizičko lice ne smije nositi oružje kada je pod uticajem alkohola, opojnih droga ili drugih omamljujućih sredstava odnosno u takvom stanju da nije u mogućnosti shvatiti značenje svog postupanja odnosno vladati svojom voljom.

Član 25.
(Čuvanje oružja i municije)

(1) Oružje i municija moraju se čuvati tako da nisu dostupni drugim licima, a naročito djeci, zaključani i odvojeni u metalnom ormaru, sefu ili sličnom spremištu koje se ne može otvoriti alatom uobičajene upotrebe.

(2) Oružje i municija moraju se čuvati u stambenom ili drugom prostoru koji se nalaze u mjestu prebivališta, odnosno sjedišta vlasnika.

(3) Vlasnici oružja, koji oružje drže na osnovu oružnog lista, dužni su da na poziv nadležne policijske stanice donesu oružje na pregled.

Član 26.
**(Postupci s oružjem i municijom u slučaju
napuštanja mjesta prebivališta)**

(1) Vlasnik oružja i municije koji napušta mjesto prebivališta na vrijeme duže od godinu dana, a oružje i municiju koje prema ovom zakonu posjeduje na osnovu oružnog lista ne nosi sa sobom, dužan ga je predati na čuvanje osobi koja ima oružni list za istu vrstu oružja ili ovlaštenom trgovcu oružjem.

(2) Vlasnik oružja i municije dužan je u slučaju iz stava (1) ovog člana, o predaji oružja i municije na čuvanje, obavijestiti nadležnu policijsku stanicu u roku od osam dana od dana predaje.

Član 27.
(Zabrana nošenja oružja)

(1) Zabranjeno je nošenje vatrenog, vazdušnog i hladnog oružja na javnim, vjerskim i sportskim okupljanjima, u obrazovnim, zdravstvenim i drugim javnim institucijama, ugostiteljskim objektima i prostorima koji se koriste za pružanje ugostiteljskih usluga, kao i prostorima gdje je javno istaknuta zabrana nošenja oružja.

(2) Odredba stava (1) ovog člana ne odnosi se na sportsko oružje, u slučaju kada se ono nosi radi takmičenja u gađanju.

(3) Ukoliko se oružje nosi na dozvoljenim mjestima, ne smije biti nošeno na način kojim se može izazvati osjećaj fizičke ugroženosti, uznemirenosti ili negodovanje građana.

(4) Van lovišta, odnosno strelišta, vatreno i vazdušno oružje mora se držati,

odnosno nositi u futrolji i ne smije biti napunjeno.

Član 28.

(Davanje oružja na posluhu i upotrebu)

(1) Zabranjeno je davanje pištolja i revolvera na posluhu drugom licu.

(2) Lovačko i sportsko oružje mogu se davati na posluhu licu koje ima oružni list ili potvrdu o prijavi za vrstu oružja koje se daje na posluhu.

(3) Izuzetno od stava (2) ovog člana, vazdušno oružje i oružje s tetivom mogu se dati na upotrebu licima koja nisu članovi streljačkih organizacija i djeci starijoj od 11 godina na sportskim streljštima i na drugim mjestima određenim i uređenim za vježbe gađanja pod nadzorom trenera koji ispunjava opće i posebne uslove iz člana 8. stav (2) tačke b), c), d) i e) i stav (3) tačka a) i b) ovog zakona i uslove propisane posebnim propisom o sportu.

Član 29.

(Povjeravanje nošenja oružja i municije)

(1) Državni organ, ustanova i pravno lice koje drži oružje i municiju na osnovu člana 18. stav (1) ovog zakona, može povjeriti nošenje tog oružja i municije samo licima koja obavljaju poslove čuvanja šuma ili poslove zaštite i koja ispunjavaju uslove za nošenje oružja propisane ovim zakonom, Zakonom o šumama ili Zakonom o agencijama i unutrašnjim službama za zaštitu ljudi i imovine.

(2) Lica iz stava (1) ovog člana, oružje i municiju koja im je povjerena, mogu nositi samo za vrijeme dok obavljaju poslove čuvanja šuma ili poslove zaštite i isto ne smiju iznositi van objekta ili područja koje se obezbjeđuje ili čuva.

(3) Izuzetno od stava (2) ovog člana, čuvari usjeva i šuma i čuvari lovišta i ribolovišta koji ne stanuju na području koje čuvaju, mogu iznositi oružje i van tog područja i nositi ga do svog mjesta stanovanja, a čuvari stada, kao i lica koja obezbjeđuju imovinu koja se prevozi ili prenosi, mogu nositi oružje prilikom obezbjeđenja te imovine, odnosno kad je to neophodno u vezi sa obezbjeđenjem te imovine.

(4) Državni organ, ustanova i pravno lice iz stava (1) ovog člana, izdaju posebnu potvrdu licu kome povjeravaju oružje i o tome su dužni obavijestiti nadležnu policijsku stanicu.

(5) Odgovorno lice kantonalnih organa državne službe, drugih kantonalnih organa i jedinica lokalne samouprave na području Kantona, dužno je postupiti po odredbama stava (1), (2), (3) i (4) ovog člana.

(6) Obrazac i sadržaj obrasca potvrde iz stava (4) ovog člana, propisuje na prijedlog policijskog komesara ministar Ministarstva.

Član 30.

(Upotreba sportskog oružja)

(1) Streljačke organizacije mogu davati na upotrebu oružje i municiju samo svojim članovima i to za vrijeme dok vrše vježbe gađanja ili se takmiče u gađanju na streljštu i na drugom terenu određenom za vršenje vježbi gađanja, odnosno takmičenja u gađanju.

(2) Ako se magacin oružja streljačke organizacije ne nalazi na streljštu, članovi streljačke organizacije moraju za nošenje oružja do streljšta ili do drugog terena određenog za vršenje vježbi gađanja, odnosno takmičenja u gađanju, imati potvrdu streljačke organizacije o vršenju vježbi gađanja, odnosno takmičenja u gađanju.

(3) Potvrda iz stava (2) ovog člana važi samo za dane kada se vrši vježba gađanja, odnosno takmičenje u gađanju.

Član 31.

(Davanje na posluhu lovačkog oružja)

(1) Organizacija koja gazduje lovištem može, radi odstrela divljači, članovima domaćih i inostranih lovačkih organizacija ukoliko isti ispunjavaju uslove propisane članom 28. stav (2) ovog zakona, dati na posluhu lovačko oružje i municiju najduže osam dana, i to samo za lov u određenom lovištu, za koji mora pribaviti prethodnu saglasnost nadležne policijske stanice.

(2) Za oružje i municiju izdatu na posluhu u smislu stava (1) ovog člana, organizacija koja gazduje lovištem izdaje potvrdu za nošenje oružja i municije, o čemu vodi evidenciju.

(3) Lice kome je dato oružje i municija na posluhu prema odredbama stava (1) i (2) ovog člana, ne smije iznositi oružje i municiju van lovišta kojim gazduje organizacija iz stava (1) ovog člana.

(4) Oružje i municiju, koje su dobili članovi domaćih i inostranih lovačkih organizacija na posluhu od organizacija iz stava (1) ovoga člana, dužni su isto vratiti sa neutrošenom količinom municije.

Član 32.

(Postupanje u slučaju prestanka potrebe za daljnjim držanjem oružja i municije)

(1) Državni organi, ustanove i druga pravna lica kod kojih je iz bilo kojih razloga prestala potreba za daljnjim držanjem oružja i municije, obavijestit će o tome u roku od 30 dana nadležnu policijsku stanicu na čijem području se oružje drži.

(2) Fizičko lice uvijek može predati nadležnoj policijskoj stanici oružje, municiju i isprave o oružju ako ga ne želi više držati i nositi iz bilo kojeg razloga.

(3) Nadležna policijska stanica preuzet će oružje i preostalu municiju iz stava (1) i (2) ovog člana i postupit će u smislu odredaba člana 37. ovog zakona.

(4) Oružje od sportske streljačke ili lovačke organizacije koja je prestala sa radom preuzet će nadležna policijska stanica, s kojim će se postupiti u skladu sa članom 39. ovog zakona.

Član 33.

(Postupanje u slučaju gubljenja ili krađe oružja i isprava o oružju)

(1) Pravna i fizička lica koja drže i nose registrovano oružje i oružje koje je nabavljeno na osnovu odobrenja za nabavljanje oružja, koje nije registrovano u roku iz člana 20. stav (1) ovog zakona, u slučaju gubitka ili krađe oružja i municije, dužni su prijaviti gubljenje ili krađu oružja i municije najkasnije u roku od 24 sata.

(2) Državni organi, ustanove i pravna i fizička lica, dužna su prijaviti gubljenje ili krađu odobrenja za držanje oružja, oružnog lista i odobrenja za nabavljanje oružja najkasnije u roku od 24 sata.

(3) Državni organi, ustanove i pravna i fizička lica, dužna su o vlastitom trošku u

“Službenim novinama Federacije BiH” oglasiti nestanak isprava o oružju, osim odobrenja za nabavljanje oružja i municije.

(4) Prijave iz stava (1) i (2) ovog člana podnose se nadležnoj policijskoj stanici prema mjestu događaja ili saznanja o gubljenju ili krađi oružja i municije. Prijava mora sadržavati okolnosti pod kojima su oružje i municija izgubljeni ili ukradeni.

(5) Odgovorno lice kantonalnih organa državne službe, drugih kantonalnih organa i jedinica lokalne samouprave na području Kantona, dužno je postupiti po odredbama stava (1), (2), (3) i (4) ovog člana.

Član 34.

(Pronalazak oružja ili municije)

Ko nađe oružje ili municiju ili sazna za sakriveno oružje ili municiju, dužan je o tome, odmah, obavijestiti najbližu policijsku stanicu.

Član 35.

(Obaveza prijave promjene prebivališta)

(1) Imalac oružnog lista, odnosno odobrenja za držanje oružja, koji promijeni prebivalište, odnosno sjedište, dužan je da se u roku od 30 dana od dana nastale promjene prijavi nadležnoj policijskoj stanici na čijem području je novo prebivalište, odnosno sjedište, radi upisa u evidenciju o izdatim oružnim listovima, odnosno o izdatim odobrenjima za držanje oružja.

(2) Imaocu oružja sa područja drugog kantona, entiteta i Brčko distrikta Bosne i Hercegovine koji prijavi prebivalište na području Kantona izdaje se novi oružni list.

(3) Izuzetno, rok iz stava (1) ovog člana, ne primjenjuje se tokom propisanog roka za postupak zamjene oružnih listova iz člana 59. stav (1) ovog zakona.

Član 36.

(Dotrajalo oružje)

(1) Imalac oružja čije je oružje dotrajalo u tolikoj mjeri da njegova upotreba može ugroziti bezbjednost građana, a ne postoji mogućnost da se oružje popravi ili prepravi, dužan je takvo oružje predati nadležnoj

policijskoj stanici i podnijeti zahtjev da se briše iz evidencije o nabavljenom oružju.

(2) Oružje iz stava (1) ovog člana prima se uz izjavu stranke datu na zapisnik, da se oružje predaje bez naknade.

(3) Sa zamijenjenim tehnički neispravnim dijelovima vatrenog i vazdušnog oružja postupa se u skladu sa stavom (1) i (2) ovog člana.

DIO ČETVRTI - ODUZIMANJE ORUŽJA I MUNICIJE

Član 37.

(Oduzimanje registrovanog oružja i municije)

(1) Oružje i municija, kao i oružni list, odnosno odobrenje za držanje oružja, oduzet će se uz rješenje ako nastupi neki od razloga iz člana 8. stav (2) tačke b), c), d) i e) i stav (3) tačka a) i c); člana 11. stav (1), kao i slučajevima iz člana 12. stav (7) ovog zakona.

(2) U slučajevima iz stava (1) ovog člana može se oduzeti i trofejno oružje, kao i staro vatreno oružje.

(3) Protiv rješenja o oduzimanju iz stava (1) i (2) ovog člana, može se izjaviti žalba policijskom komesaru u roku od 15 dana od dana prijema rješenja.

(4) Žalba na rješenje iz stava (3) ovog člana ne odgađa izvršenje.

(5) Protiv rješenja po žalbi može se voditi upravni spor.

Član 38.

(Oduzimanje neregistrovanog oružja i municije)

(1) Nadležna policijska stanica rješenjem će oduzeti oružje i municiju od pojedinca, državnih organa, ustanova i drugih pravnih lica koji nabave oružje ili municiju bez propisanog odobrenja za nabavljanje ili drže oružje bez oružnog lista, odnosno bez propisanog odobrenja za držanje.

(2) Protiv rješenja o oduzimanju iz stava (1) ovog člana može se izjaviti žalba policijskom komesaru u roku od 15 dana od dana prijema rješenja koja ne odlaže izvršenje.

(3) Protiv rješenja po žalbi ne može se voditi upravni spor.

(4) Oružje i municija iz stava (1) ovog člana oduzimaju se bez prava naknade i isto se uništava u skladu sa članom 39. stav (4) ovog zakona.

Član 39.

(Postupak sa predatim i oduzetim oružjem)

(1) Oduzimanje oružja, municije, oružnog lista, odobrenja za držanje oružja i potvrde o prijavi u svim slučajevima predviđeni ovim zakonom, vrši nadležna policijska stanica.

(2) Za oduzeto oružje, municiju i isprave iz stava (1) ovog člana, izdaje se potvrda.

(3) Izvršno rješenje nadležne policijske stanice o oduzimanju oružja i municije, izvršava policijski službenik Ministarstva, bez donošenja zaključka o dozvoli izvršenja.

(4) U slučaju da vlasnik oružja ne preda oružje i municiju policijskom službeniku iz stava (3) ovog člana, nadležna policijska stanica protiv istog podnijet će izvještaj o počinjenom krivičnom djelu zbog nelegalnog držanja i nošenja oružja i municije.

(5) Po pravosnažnosti rješenja o oduzimanju oružja i municije iz člana 37. ovog zakona, nadležna policijska stanica pozvat će vlasnika oružja da u roku od tri mjeseca nađe kupca za oduzeto oružje i municiju, pa ako vlasnik u propisanom roku ne nađe kupca, oduzeto oružje i municija će se prodati putem licitacije.

(6) Prihod od prodatih predmeta će ići u korist budžeta Kantona, a u slučaju nemogućnosti prodaje oduzeto oružje i municija će biti uništeni.

(7) Postupak uništenja i prodaje oduzetog oružja i municije sprovodi posebna komisija koju obrazuje na prijedlog policijskog komesara ministar Ministarstva.

(8) Komisija iz stava (7) ovog člana, o uništenju oduzetog oružja i municije sačinjava zapisnik koji se ulaže u spis.

DIO PETI - PROMET ORUŽJA I MUNICIJE

Član 40.

(Promet oružjem i municijom na malo)

(1) Prometom oružja kategorije B, C i D, dijelova za oružje i municije mogu se baviti pravno lice i obrtnik, koji prije upisa u sudski registar odnosno registar radnji, za to dobiju odobrenje nadležne policijske stanice.

(2) Odobrenje iz stava (1) ovog člana nadležna policijska stanica će izdati:

a) ako su ispunjeni prostorni i tehnički uslovi za smještaj i čuvanje kojima se obezbjeđuje da oružje, dijelovi za oružje i municija ne dođu u posjed neovlaštenih lica i ne ugroze bezbjednost ljudi i objekata,

b) ako lice koje neposredno rukuje oružjem, dijelovima za oružje i municijom u pravnom licu, odnosno obrtnik, ispunjava uslove propisane članom 8. stav (2) tačka b), c), d) i e) i stav (3) tačka a) i b) ovog zakona,

c) da ima pravo vlasništva ili pravo korištenja poslovnog prostora u kojem će se obavljati promet oružja i municije.

(3) Za promet oružja, dijelova za oružje i municije između pravnih lica, odnosno obrtnika potrebno je posebno odobrenje nadležne policijske stanice, koje se izdaje u formi rješenja na zahtjev kupca, za svaku ugovorenu količinu.

(4) Zahtjev za izdavanje odobrenja iz stava (3) ovog člana sadrži: naziv i adresu prodavca i kupca; vrstu i količinu oružja, dijelova za oružje i municije; naziv i adresu proizvođača“.

(5) Nadležna policijska stanica oduzet će odobrenje iz stava (2) ovog člana ako pravno lice i obrtnik, odnosno lice koje neposredno rukuje oružjem, dijelovima za oružje i municijom u pravnom licu i vlasnik obrta, prestanu ispunjavati jedan od uslova iz stava (2) ovog člana.

(6) Uslove iz stava (2) tačka a) i c) ovog člana utvrđuje posebna komisija koju imenuje rukovodilac nadležne policijske stanice.

Član 41.

(Čuvanje i držanje oružja od strane pravnih lica i obrtnika)

Pravno i fizičko lice koje se bavi prometom oružja i municije, kao i pravno lice i obrtnik koji drži oružje i municiju na osnovu

ovog zakona, dužni su da oružje i municiju drže i čuvaju u skladu sa ovim zakonom i drugim propisima.

Član 42.

(Prodaja oružja i municije na malo)

(1) Pravno i fizičko lice iz člana 40. ovog zakona može prodavati oružje i municiju samo organima, pravnim licima i pojedincima koji imaju odobrenje za nabavljanje oružja i municije ako je po ovom zakonu za nabavljanje takvog oružja i municije potrebno odobrenje.

(2) Pravno i fizičko lice iz člana 40. ovog zakona dužno je da:

a) prilikom prodaje oružja i municije zadrži jedan primjerak odobrenja za nabavljanje oružja i municije, a na drugi primjerak stavi zabilješku o izvršenoj prodaji i ovjeri je štambiljem i potpisom odgovornog lica i

b) u roku od pet dana od dana prodaje o tome pismeno obavijesti nadležnu policijsku stanicu koja je izdala odobrenje za nabavljanje oružja i municije.

(3) Pravno i fizičko lice iz člana 40. ovog zakona može prodavati municiju pod uslovima iz člana 11a. stav (4) ovog zakona.

Član 43.

(Evidencija o nabavljenom i prodatom oružju i municiji)

(1) Pravno i fizičko lice iz člana 40. ovog zakona dužni su da vode evidenciju o nabavljenom i prodatom oružju i municiji.

(2) Evidencija o prometu oružja i municije vodi se u knjigama evidencije po vrstama oružja i municije, koje moraju biti ovjerene od nadležne policijske stanice.

Član 44.

(Propisi o smještaju i čuvanju oružja i municije i obaveznim evidencijama)

Bliže propise o smještaju i čuvanju oružja, o vođenju evidencije o nabavljenom oružju i municiji, vođenju evidencije o prometu oružja i municije i vođenju evidencije o potvrdama za nošenje oružja i municije, izdatih od strane organizacije koja gazduje lovištem, državni organi, agencije za zaštitu ljudi i

imovine i unutrašnje službe zaštite, kao i obrascima i sadržaju obrazaca za vođenje tih evidencija, na prijedlog policijskog komesara donosi ministar Ministarstva.

DIO ŠESTI– POPRAVLJANJE I PREPRAVLJANJE ORUŽJA I MUNICIJE

Član 45.

(Pravna lica i obrtnici ovlašteni za popravlanje i prepravlanje oružja)

(1) Popravljanjem i prepravljanjem oružja može se baviti pravno lice i obrtnik [koje prije upisa u sudski registar, odnosno registar radnji ili drugi registar, za to dobiju odobrenje nadležne policijske stanice.](#)

(2) [Nadležna policijska stanica izdat će odobrenje iz stava \(1\) ovog člana pravnom licu i obrtniku koji ispunjava uslove iz člana 40. ovog zakona. O svakoj izvršenoj prepravci pravno lice i obrtnik obavijestit će u roku od 48 sati u pismenoj formi nadležnu policijsku stanicu”.](#)

(3) U pravnom licu i kod obrtnika iz stava (1) ovog člana popravlanje i prepravlanje oružja može obavljati samo punoljetno lice koje ispunjava uslove propisane članom 8. stav (2) tačke b), c), d) i e) i stav (3) [tačka a\) i b\)](#) ovog zakona.

Član 46.

(Oružje koje može biti predmet popravlanja i prepravlanja)

Pravno lice i obrtnik iz člana 45. ovog zakona mogu primiti radi popravlanja i prepravlanja samo oružje za koje je izdat oružni list, odnosno odobrenje za držanje oružja ili odobrenje za nabavljanje oružja.

Član 47.

(Evidencija i propisi o načinu vođenja evidencija)

(1) Pravno lice i obrtnik koji se bave popravljanjem i prepravljanjem oružja dužni su voditi evidenciju o popravljenom i prepravljenom oružju.

(2) Bliže propise o načinu vođenja evidencije o popravljenom i prepravljenom oružju i obrascima i sadržaju obrazaca o vođenju ove evidencije, na prijedlog

policijskog komesara donosi ministar Ministarstva.

DIO SEDMI - NADZOR

Član 48.

(Nadzor koji provodi nadležna policijska stanica)

Nadležna policijska stanica, ako drugim zakonom nije drugačije određeno, vrši neposredni nadzor nad prometom, držanjem i nošenjem oružja i municije, čuvanjem i smještajem oružja i municije od strane pravnih i fizičkih lica koja se bave prometom oružja i municije, sportskih streljačkih organizacija, organizacija koje gazduju lovištem, državnih organa i ustanova, agencija za zaštitu ljudi i imovine, unutrašnjih službi zaštite i pravnih lica i obrtnika koji se bave popravljanjem i prepravljanjem oružja, kao i nadzor nad vođenjem evidencija, o:

- a) nabavljenom oružju i municiji,
- b) prometu oružja i municije,
- c) popravljenom i prepravljenom oružju i municiji,
- d) oružju i municiji datom na poslugu, i
- e) oružju i municiji datom na čuvanje.

Član 49.

(Privremeno oduzimanje oružja, municije i [isprava o oružju](#))

(1) Policijski službenik Ministarstva može od lica, za koje postoje osnovi sumnje da je izvršilo krivično djelo ili prekršaj određen ovim zakonom, i sam privremeno oduzeti [isprave o oružju](#), oružje, dijelove za oružje i municiju za koje postoje osnovi sumnje da je njima izvršeno krivično djelo ili prekršaj ili su pribavljeni krivičnim djelom ili prekršajem ili su nastali izvršenjem krivičnog djela ili prekršaja, [kao i ostalo oružje iz člana 6a. koje lice nabavi, drži i nosi protivno odredbama ovog zakona.](#)

[\(2\) Lice iz stava \(1\) ovog člana dužno je policijskom službeniku odmah predati oružje, municiju, dijelove za oružje i isprave o oružju, i prije okončanja upravnog, prekršajnog i krivičnog postupka.](#)

(3) Prilikom izvršavanja ovlaštenja propisanih u stavu (1) [i \(2\)](#) ovog člana,

policijski službenik Ministarstva dužan je izdati potvrdu o privremeno oduzetim predmetima.

Član 50. (Evidencija otisaka oružja)

(1) Državni organi, ustanove, pravna i fizička lica koja imaju registrovano oružje na području Kantona, dužni su omogućiti Ministarstvu uzimanje otisaka oružja (mehanički trag čahure i zrna), radi nosa otiska u propisanu evidenciju.

(2) U Ministarstvu poslove iz stava (1) ovog člana, kao i vođenje zbirke oružja i municije, će obavljati Uprava policije.

(3) Za uzimanje otisaka oružja iz stava (1) ovog člana ne naplaćuje se naknada.

DIO OSMI - KAZNENE ODREDBE

Član 51. (Sankcije)

(1) Sankcije koje se mogu izreći za krivična djela propisane ovim zakonom su: kazna zatvora, novčana kazna i mjera sigurnosti oduzimanje oružja.

(2) Sankcije koje se mogu izreći za prekršaje propisane ovim zakonom su: novčana kazna, zaštitna mjera oduzimanje oružja i municije, dijelova za oružje, oružnog lista, odobrenja za držanje oružja i snajpera i zaštitna mjera zabrana vršenja djelatnosti.

Član 52. (Krivična djela)

(1) Kaznom zatvora do tri godine, kaznit će se za krivično djelo:

a) ko bez odobrenja nabavi vatreno oružje, dijelove za vatreno oružje ili municiju, kad je za nabavljanje tog oružja, dijelova za oružje i municiju potrebno odobrenje;

b) ko bez odobrenja drži vatreno oružje, dijelove za vatreno oružje ili municiju, kad je za nabavljanje tog oružja, dijelova za oružje i municiju potrebno odobrenje;

c) ko bez odobrenja nosi vatreno oružje, dijelove za vatreno oružje ili municiju, kad je za nabavljanje tog oružja, dijelova za oružje i municiju potrebno odobrenje.

(2) Za krivična djela iz stava (1) ovog člana, obavezno se izriče i mjera sigurnosti oduzimanja oružja i oružnog lista, dijelova za oružje i municije.

Član 53. (Krivična djela)

(1) Novčanom kaznom ili kaznom zatvora do tri godine, kaznit će se za krivično djelo:

a) ko proda vatreno oružje, dijelove za vatreno oružje ili municiju pravnom licu ili pojedincu koji nemaju odobrenje za nabavljanje te vrste oružja;

b) ko drugom da pištolj ili revolver na poslugu ili ko da na poslugu lovačko oružje licu koje za tu vrstu oružja nema oružni list.

(2) Za krivična djela iz stava (1) ovog člana, obavezno se izriče i mjera sigurnosti oduzimanja oružja, dijelova za oružje i municije.

(3) U izvršenju mjere sigurnosti iz stava (2) ovog člana za krivična djela iz stava (1) tačka a) i b) ovog člana oduzima se oružni list.

Član 54. (Novčane kazne i zaštitne mjere za fizička lica za prekršaje)

(1) Novčanom kaznom od 300,00 do 1.500,00 KM kaznit će se za prekršaj fizičko lice koje:

a) nabavi, drži ili nosi hladno oružje (član 6b. stav (1) tačka a) alineja 2) i 3)),

b) postupi protivno odredbama člana 16. ovog zakona,

c) skuplja staro oružje bez odobrenja (član 15. stav (2)) ili ko upotrebljava staro oružje kao oružje ili nabavlja, spravlja ili drži municiju za ovo oružje (član 15. stav (3)), kao i imalac starog oružja koji to oružje ne prijavi nadležnoj policijskoj stanici (član 15. stav (4)),

d) postupi protivno odredbama člana 27. stav (1), (3), (4) i (5) ovog zakona,

e) se bavi prometom oružja i municije protivno odredbama člana 40. ovog zakona i

f) ne drži ili ne čuva oružje i municiju na propisan način (član 41.).

(2) Za prekršaj iz stava (1) tačke a), b), c) i d) ovog člana, pored novčane kazne, obavezno se izriče i zaštitna mjera oduzimanja oružja, dijelova za oružje i municije.

(3) U izvršenju zaštitne mjere iz stava (2) ovog člana oduzima se oružni list, [odobrenje za sakupljanje starog oružja i potvrda o prijavi oružja](#).

Član 55.

(Novčane kazne i zaštitne mjere za fizička lica za prekršaje)

(1) Novčanom kaznom od 200,00 KM do 1.000,00 KM, kaznit će se za prekršaj fizičko lice koje:

a) zamijenjene tehnički ispravne dijelove vatrenog i vazdušnog oružja, koji se označavaju fabričkim brojem, ne preda nadležnoj policijskoj stanici (član 10. stav [\(8\)](#) i [član 16. stav \(7\)](#)),

b) drži ili nosi oružje bez oružnog lista kad je za držanje ili nošenje tog oružja potreban oružni list ili na zahtjev policijskog službenika i drugog ovlaštenog službenog lica Ministarstva ne omogući uvid u to oružje ili oružni list (član 12. stav (2)),

c) bez odobrenja drži trofejno oružje, ili ga nosi ili upotrebljava, ili za ovo oružje drži ili nabavlja municiju (član 14. stav (1) i (2)),

d) nabavi, drži i nosi oružje za uspavlivanje životinja protivno odredbama člana 16. ovog zakona,

e) u određenom roku ne prijavi nabavku snajpera (član 17. stav (1)), ili ko u određenom roku ne prijavi otuđenje, nestanak ili gubljenje snajpera (član 17. stav (2)),

f) ne preda na čuvanje nadležnoj policijskoj stanici oružje, oružni list, odnosno dozvolu za držanje trofejnog oružja i municije u slučaju smrti imaoca oružja (član 19. stav (1)),

g) u propisanom roku ne podnese pismeni zahtjev nadležnoj policijskoj stanici radi izdavanja oružnog lista (član 20. stav (1)), odnosno u propisanom roku ne vrati odobrenje za nabavljanje oružja (član 20. stav (2)),

h) u propisanom roku ne obavijesti nadležnu policijsku stanicu o zamjeni vatrenog [i sportskog](#) oružja (član 21. stav (2)),

i) u propisanom roku ne prijavi prenos prava vlasništva na vatrenom i [sportskom](#) oružju (član 22. stav (3)),

j) postupi protivno odredbama člana 24. ovog zakona,

k) postupi protivno odredbama člana 25. ovog zakona,

l) nosi oružje ili municiju koji su mu povjereni u vrijeme kada ne vrši službu, ili iznese oružje i municiju van područja, odnosno objekta koji se obezbjeđuje ili čuva (član 29. stav (2)),

m) kao član streljačke organizacije koji nosi oružje van strelišta ili drugog terena određenog za vršenje vježbi gađanja, odnosno takmičenja u gađanju, bez potvrde streljačke organizacije o vršenju vježbi gađanja, odnosno takmičenja u gađanju (član 30. stav (2)),

n) ne vrati organizaciji koja gazduje lovištem oružje, odnosno neutrošenu količinu municije dobijenu na poslu u određenom roku ili ih upotrebljava, odnosno iznosi van određenog lovišta (član 31.),

o) ne prijavi gubitak ili krađu oružja ili municije koje drži na osnovu oružnog lista ili na osnovu odobrenja za držanje oružja (član 33. stav (1) i (2)),

p) u propisanom roku ne prijavi promjenu prebivališta radi evidentiranja oružja (član 35.),

q) postupi protivno odredbama člana 36. stav (1) i (3) ovog zakona,

r) ne omogući Ministarstvu uzimanje otisaka oružja (mehanički trag zrna i čahure), radi unosa otiska u propisanu evidenciju (član 50. stav (1)),

s) da na poslugu sportsko oružje licu koje nema oružni list ili potvrdu o prijavi za vrstu oružja koje se daje na poslugu (član 28. stav (2)).

t) policijskom službeniku ne preda oružje, municiju, dijelove za oružje i isprave o oružju (član 49. stav (2)).

(2) Za prekršaje iz stava (1) tačke b), c), d), e), f), g), h), i), j), k), q) i s) ovog člana, pored predviđene novčane kazne, obavezno se izriče i zaštitna mjera oduzimanja oružja, kao i zaštitna mjera oduzimanja snajpera.

(3) U izvršenju zaštitne mjere iz stava (2) ovog člana oduzima se municija, oružni list, odobrenje za držanje trofejnog oružja i potvrda o prijavi oružja.

Član 56.

(Novčane kazne i zaštitne mjere za prekršaje pravnim licima i obrtnicima ovlaštenim za popravljnje i prepravljnje oružja)

(1) Novčanom kaznom od 3.000,00 do 15.000,00 KM, kaznit će se za prekršaj pravno lice koje:

a) u određenom roku ne prijavi nabavku snajpera (član 17. stav (1)) ili koje u određenom roku ne prijavi otuđenje, nestanak ili gubljenje snajpera (član 17. stav (2)),

b) u propisanom roku ne podnese pismeni zahtjev nadležnoj policijskoj stanici za registraciju oružja i municije (član 20. stav (1)), koje u propisanom roku ne vrati odobrenje za nabavljanje oružja i municije (član 20. stav (2)), odnosno ne vodi evidenciju o nabavljenom oružju i municiji (član 18. stav (5)),

c) u propisanom roku ne obavijesti nadležnu policijsku stanicu o zamjeni vatrenog i sportskog oružja (član 21. stav (2)).

d) se bavi prometom oružja i municije, ukoliko u propisanom roku ne obavijesti nadležnu policijsku stanicu o izvršenoj zamjeni vatrenog i sportskog oružja (član 21. stav (3)),

e) u određenom roku ne prijavi prenos prava vlasništva na oružju nadležnoj policijskoj stanici (član 22. stav (3)),

f) postupi protivno odredbama člana 27. stav (5) ovog zakona,

g) povjeri nošenje oružja i municije licu koje nije određeno da neposredno vrši poslove zaštite i koje ne ispunjava uslove za nošenje oružja propisane ovim zakonom (član 29. stav (1)) ili koje naredi ili dozvoli da lice kome je povjereno oružje radi vršenja poslova zaštite nosi to oružje suprotno odredbama člana 29. stav (2) i (3) ovog zakona, odnosno koje ne obavijeste nadležnu policijsku stanicu o licu kojem je povjerilo oružje (član 29. stav (4)),

h) kao streljačka organizacija da na upotrebu oružje i municiju licu koje nije njen član, ili da oružje i municiju svom članu suprotno odredbama člana 30. ovog zakona,

i) gazduje lovištem ako postupi suprotno odredbama člana 31. stav (1) i (2) ovog zakona,

j) ne obavijesti u propisanom roku nadležnu policijsku stanicu o prestanku potrebe za daljnjim držanjem oružja i municije (član 32. stav (1)),

k) ne prijavi u propisanom roku nestanak oružja koje drži na osnovu odobrenja za držanje, kao i nestanak municije (član 33. stav (1) i (2)),

l) ne preda oružje koje je dotrajalo u tolikoj mjeri da njegova upotreba može ugroziti bezbjednost ljudi, a koje se ne može popraviti ili prepraviti ili ne preda zamijenjene tehnički neispravne dijelove vatrenog ili vazdušnog oružja (član 36. stav (1) i (3)),

m) se bavi prometom oružja i municije protivno odredbama člana 40. ovog zakona,

n) ne drži ili ne čuva oružje i municiju na propisan način (član 41.),

o) se bavi prometom oružja i municije ako postupi protivno odredbama člana 42. stav (2) i (3) ovog zakona,

p) se bavi prometom oružja i municije ako ne vodi evidenciju o nabavljenom i prodatom oružju i municiji, ili je ne

vode u knjigama evidencije po vrstama oružja i municije (član 43.),

r) se bavi popravljajem i prepravljajem oružja protivno odredbama člana 45. ovog zakona,

s) primi na popravljaje ili prepravljaje oružje za koje nije izdat oružni list ili odobrenje za nabavljanje ili držanje oružja (član 46.),

t) se bavi popravljajem i prepravljajem oružja ako ne vodi evidenciju o popravljenom i prepravljenom oružju, ili je ne vodi na propisanom obrascu (član 47.),

u) ne omogući Ministarstvu uzimanje otisaka oružja (mehanički trag zrna i čahure) radi unosa otiska u propisanu evidenciju (član 50. stav (1)),

v) postupi protivno odredbama člana 18. stav (2).

(2) Novčanom kaznom od 300,00 do 1.500,00 KM, kaznit će se za prekršaj obrtnik koji:

a) ne drži ili ne čuva oružje i municiju na propisan način (član 41.),

b) se bavi popravljajem i prepravljajem oružja protivno odredbama člana 45. ovog zakona,

c) primi na popravljaje ili prepravljaje oružje za koje nije izdat oružni list ili odobrenje za nabavljanje ili držanje oružja (član 46.),

d) se bavi popravljajem i prepravljajem oružja ako ne vodi evidenciju o popravljenom i prepravljenom oružju, ili je ne vodi na propisanom obrascu (član 47.) i

e) ne omogući Ministarstvu uzimanje otisaka oružja (mehanički trag zrna i čahure) radi unosa otiska u propisanu evidenciju (član 50. stav (1)).

(3) Za prekršaje iz stava (1) ovog člana kaznit će se novčanom kaznom od 300,00 do 1.500,00 KM i odgovorno lice u pravnom licu, u kantonalnim organima državne uprave, drugim kantonalnim organima i jedinicama lokalne samouprave.

(4) Pored novčane kazne, za prekršaj iz stava (1) tačke a), d), e), j), l), n), s) i u) i stava

(2) tačke b) i e) ovog člana izreći će se i zaštitna mjera oduzimanja predmeta, a za prekršaje iz stava (1) tačke m), r), s), t) i v) i stava (2) tačke a), b) i c), izreći će se i zaštitna mjera zabrane vršenja djelatnosti do šest mjeseci.

DIO DEVETI- PRIJELAZNE I ZAVRŠNE ODREDBE

Član 57.

(Prijava nelegalnog oružja)

(1) Lice koje nelegalno posjeduje oružje dužno je posjedovanje takvog oružja prijaviti najbližoj policijskoj stanici radi predaje ili onesposobljavanja.

(2) Policijski službenik će preuzeti oružje i municiju iz stava (1) ovog člana, na mjestu na kome se ono nalazi.

(3) Policijski službenik će o preuzetom oružju i municiji iz stava (2) ovog člana, izdati potvrdu.

(4) Ako lice želi onesposobiti oružje iz stava (1) ovog člana, dužno je podnijeti nadležnoj policijskoj stanici zahtjev za onesposobljavanje oružja, u roku od osam dana od dana predaje oružja.

(5) Troškove onesposobljavanja oružja snosi podnosilac zahtjeva.

(6) Ako lice postupi u skladu sa stavom (1) ovog člana, a prije istražnih radnji policije, u skladu sa Zakonom o prekršajima Federacije Bosne i Hercegovine („Službene novine Federacije Bosne i Hercegovine“, broj 31/06) i početka istrage krivičnog djela, te hitnih istražnih radnji u skladu sa Zakonom o krivičnom postupku Federacije Bosne i Hercegovine („Službene novine Federacije Bosne i Hercegovine“, broj 35/03, 37/03, 56/03, 78/04, 28/05, 55/06, 27/07 i 53/07) odnosno početkom primjene policijskih ovlaštenja utvrđenih Zakonom o policijskim službenicima Zeničko-dobojskog kantona („Službene novine Zeničko-dobojskog kantona“, broj 8/06, 20/07 i 9/09), neće se pokretati prekršajni, niti krivični postupak.

Član 58.

(Provedbeni propisi)

U roku od tri mjeseca od dana stupanja na snagu ovog zakona, na prijedlog policijskog

komesara ministar Ministarstva će donijeti propise o:

a) evidencijama koje se vode u Ministarstvu u vezi sa nabavljanjem, držanjem i nošenjem oružja, obrasce, sadržaj obrazaca i način vođenja tih evidencija (član 7.; [član 14.](#); [član 15.](#); [član 16.](#); [član 12. stav \(7\)](#); [član 18. stav \(5\)](#); član 32.; 36.; 37.; 38. i član 39. stav (1); [član 12. stav \(9\)](#); član 17. stav (4); član 19. stav (1); član 31.; član 44.; član 50. stav (1) i (2)),

b) programu, načinu i troškovima rada Komisije za ocjenu osposobljenosti za pravilno rukovanje, držanje i nošenje kratkog vatrenog oružja (član [9c.](#) stav [\(3\)](#)),

c) obrascu i sadržaju obrasca potvrde i evidencije o potvrdama koje državni organi i druga pravna lica izdaju licu kome povjeravaju oružje i municiju (član 29. stav (6)),

d) evidenciji pravnih i fizičkih lica o nabavljenom i prodatom oružju i municiji (član 43.), i

e) načinu vođenja evidencija pravnih lica i obrtnika o popravljenom i prepravljenom oružju i obrascima i sadržaju obrazaca o vođenju te evidencije (član 47. stav (2)).

Član 59.

(Zamjena oružnih listova izdatih od strane nadležnih organa u Bosni i Hercegovini po ranijem zakonodavstvu)

(1) Lica koja danom stupanja na snagu ovog zakona imaju oružni list, bez obzira na datum njegovog izdavanja od strane nadležnog organa u Bosni i Hercegovini, dužna su u roku od četiri godine od dana stupanja na snagu ovog zakona, podnijeti zahtjev za zamjenu oružnog lista nadležnoj policijskoj stanici.

(2) U postupku zamjene oružnog lista utvrđuje se ispunjavanje uslova iz člana 12. stav [\(6\)](#) ovog zakona.

(3) Ukoliko lice ne postupi u skladu sa stavom (1) ovog člana, primjenit će se odredbe člana 12. stav [\(7\)](#) ovog zakona.

Član 60.

(Izdavanje odobrenja za oružje koje je dodijeljeno po osnovu nagrade ili prilikom odlaska u penziju)

(1) Lica koja u trenutku stupanja na snagu ovog zakona posjeduju oružje po osnovu važeće odluke o dodjeli vatrenog oružja po osnovu nagrade ili prilikom odlaska u penziju, bez obzira na datum dodjele vatrenog oružja, dužna su u roku iz člana 59. ovog zakona podnijeti zahtjev za izdavanje odobrenja za nabavljanje oružja, kao i zahtjev za registraciju oružja.

(2) Prilikom rješavanja po zahtjevu lica iz stava (1) ovog člana primjenjuju se odredbe člana 8. [i 10.](#) ovog zakona.

(3) Ukoliko lice iz stava (1) ovog člana ne postupi u skladu sa odredbama iz stava (1) ovog člana, primjenit će se odredbe člana 37. i 39. ovog zakona.

Član 61.

(Primjena Zakona o agencijama i unutrašnjim službama za zaštitu ljudi i imovine)

Odredbe ovog zakona primjenjuju se u postupku nabavljanja oružja i municije na pravna lica koja obavljaju poslove fizičke i tehničke zaštite u skladu sa Zakonom o agencijama i unutrašnjim službama za zaštitu ljudi i imovine.

Član 62.

(Započeti postupci)

Svi postupci koji do dana stupanja na snagu ovog zakona nisu pravosnažno okončani završit će se po odredbama zakona koji je bio u primjeni na području Kantona u vrijeme donošenja ovog zakona.

Član 63.

(Ravnopravnost spolova)

Gramatička terminologija u ovom zakonu podrazumijeva uključivanje lica oba spola.

Član 64.

(Prestanak važenja)

Danom stupanja na snagu ovog zakona, na području Kantona prestaje primjena Zakona o nabavljanju, držanju i nošenju oružja i municije - Novi prečišćeni tekst ("Službeni list Socijalističke Republike Bosne i Hercegovine", broj: 42/90 i "Službeni list Republike Bosne i Hercegovine", broj: 13/93 i 13/94).

Član 65.

(Usklađivanje djelatnosti i stupanje na snagu)

(1) Pravno lice i obrtnik iz člana 40. i 45. ovog zakona koji na dan stupanja na snagu ovog zakona obavlja djelatnost prometa oružja, dijelova za oružje i municije, odnosno popravljivanja i prepravljivanja oružja, dužno je svoje poslovanje uskladiti sa odredbama ovog zakona u roku od šest mjeseci od dana stupanja na snagu ovog zakona.

(2) Listu zdravstvenih ustanova iz člana 9b. stav (2) Ministarstvo zdravstva Zeničko-dobojskog kantona će utvrditi u roku od 30 dana od dana stupanja na snagu ovog zakona.

(3) Ovlašćuje se Zakonodavno-pravna komisija Skupštine Zeničko-dobojskog kantona da utvrdi prečišćeni tekst Zakona o nabavljanju, držanju i nošenju oružja i municije.

(4) Ovaj zakon stupa na snagu osmog dana od dana objavljivanja u "Službenim novinama Zeničko-dobojskog kantona".

Broj:
Datum,
Zenica

Predsjedavajući
Sretko Radišić